

La vôs di un predi pôc puartât a restâ in rie, che al acuse la politiche di decidi dome su la fonde di calçui economics e la Glesie di no fâ avonde par prudelâ la lenghe furlane. » DI ALESSANDRO DI GIUSTO

Un pas daûr chel altri viers il precipizi, te indifferene o te complicitât cidine di chei che invezit il Friûl e la sô identitât a varessin di difindiju. **Pre Giuliano Mauro**, predi di simpri pôc puartât a restâ in rie e che nol à mai rinunziât a predicjâ par furlan, al pant fuarte preocupazion par ce che al sta sucedint: "O stin vivint un procès di anulament de nestre identitât, començât sot vie tal dopo taramot e aromai diventât impetuôs. La Patrie dal Friûl e ven stricade, cuasi scancelade, de stesse Region che no ten cont des nestris peculiaritâts e che e somee decidi ogni cuistion su la fonde di sempliç calçui economics. Si trate di une ande grivie, che e cja-pe dentri dutis lis fuarcis politichis cence ecezions".



## Il fâ de politiche e il tasê de glesie

### Ce isal che lu preocupe di plui? Il nivel di tutele de lenghe o lis sieltis che a dividin il Friûl?

"E je evidente la continue compression de cuistion identitarie, scomençant propit de nestre lenghe. Tal País Basc, a insegnin prin di dut la lenghe basche, po l'inglês e, par ultin il spagnûl. Ca di nô invezit si fâs il contrari. Anzit, cui che al dopre il furlan cualchi volte al somee che al dedi cuasi fastidi. Come se nol fos avonde, a fasin di dut par sfruçonâ il Friûl, de riforme dal coleç eletorâl ae creazion des Unions teritoriâls intercomunâls. E po e je ancje la Glesie..."

### Ce criticial de Glesie?

"Fint al taramot, tancj esponents de Glesie a àn fat de identitât un

element fondant. Al baste ricuardâ Checo Placerean, Saverio Beinat, Pieri Londero, cence dismenteâ Glesie Furlane. Vuê, denant dal sfruçonament dal Friûl decidût de politiche, si tâs. E il stes al vâl par dutis lis sieltis politichis che a ignorin in maniere palese il Friûl. La nestre lenghe e je simpri manc cul doprade te liturgjie e o stin ançjemò spietant il messâl, domandât di tancj agns aromai. La nestre diocesi e publiche cuasi dut par talian. Di furlans, slovens e todescs, minorancis presintis sul nestri teritori, si visisi dome in ciertis celebracions uficiâls. Masse pôc".

### Nissun al improbis ai predis di celebrâ la messe par furlan.

"E je vere, ma aromai a son pôcs chei che lu sa, parcè che no

lu cognossin, no àn voie o magari a preferissin evità il rugnâ di cui che no lu capis. E pûr, cui che al ven a vivi in Friûl al varès ancje di vê voie di fevelâ la nestre lenghe tant che imprest par integrâsi miôr, cemût che al sucèt par esempi in Sud Tiròl. Tai uficis il furlan al reste plui une declarazion di principi che altri. Mi domandi ce che al sucedarà a scuele cuant che a rivaran i gnûfs insegnants di fûr region. Insome, o riscjin di pierdi un patrimoni inestimabil, di diventâ plui puars dal pont di viste culturâl e duncje plui omologâts, si ben che il furlan al è ricognossût a nivel talian e internazionâl tant che lenghe".



alessandro.digiusto@ilfriuli.it

### LADINS IN FIESTE

#### A Sant Denêl cunvigne su identitât e turisim

Ancje chest an Sant Denêl Al ospite l'event "Ladins in Fieste". La edizion 2015 e in program par sabide ai 12 di Setembar des 5 e mieze dopomisdî li de biblioteche Vuarneriane dulà che si davuelzarà la cunvigne "La identitat tant che fator di inçressite dal turisim e de economie".

A partecipin **Marzio Strassoldo**, economist e autôr de publicazion "Economie des minorancis linguisticis"; **Sabrina Rasom**, responsabiledal Servizi pe lenghe ladine dal Comun general de Fascia (Trento); **Guglielmo Lasagna**, albergadôr di Vigo di Fassa e ideatôr dal progjet "Ladinhotel"; **Elena Gasparin**, assessore al Turisim di Cormons e presidente de associazion "Amîs de Mont Quarine"; **Lorenzo Zanon**, president dal Istitût ladin furlan "Pre Checo Placerean". Al modere l'event **William Cislino**, diretôr de Agjenzie regionâl pe lenghe furlane. Dopo dal ghiringhel, aes 9 di sere al sarâ il concerti di musiche cun **Martina Iori**, vincido-re dal festival Suns tal 2014.

### SCOLTADIS DI DRIUS

#### Il flôr e il vâs

Ae femine no si po' petâi nancje cun tun flôr.

Ma nissun al proibis di doprâ el vâs.



Euronews informa

## I piçui museus e riscjin di sierâ cun la riforme dai bens culturâi

Indebilment de ufierte culturâl cun pierdite di un element impuartant di valorizazion de identitât furlane e dificolât di acès aes risorsis pai piçui museus, che a riscjin di sierâ. Chestis a saran lis consecuençis, pal president de Provincie di Udin Pietro Fontanini, de gnove gjestion dai bens culturâi in FVJ. Consecuençis che il President al à scrit neri su blanc intune letare trasmetude ai referents dai museus de rêr provinciâl. "Dal 1 di Zenâr dal 2016 si fermeran lis azions di cheste amministrazion provinciâl a pro de rêr museâl" al dis Fontanini ricuardant che l'Ent nol poiarà plui lis bibliotechis, il prestit interbibliotecari e, in gjenerâl, intervents par valorizâ i

### Fontanini al scrîf ai referents des struturis de rêr provinciâl

bens culturâi di valôr storic, artistic e ambientâl. "La competence e sarâ trasferide aes Uti e soledut ae Region - al sclaris il President -. Chest al puartarà a une rotture de azion unitarie fate de Provincie a nivel provinciâl, a la pierdite di un element impuartant di valorizazion de identitât comune di chest teritori, fruonât in dis Unions teritoriâls intercomunâls. Di chê altre bande l'incençrament des funzions di coordinament e contributivis a nivel regionâl al puartarà il pericol par tantis



piçulis struturis di no podê vê plui nissune poie pe valorizazion des lôr ativitâts, par vie che no varan plui i standard che a vignaran stabilîts a nivel regionâl". I stes pericui a riscjin di cori ancje tancj bens dal patrimoni culturâl locâl: i relatifs pro-

gjets di invistiment pe conservazion e la valorizazion a saran di fat determinâts dome dal acès a bants cun modalitât, criteris e prioritâts di intervent determinâts a nivel regionâl. "Ve ca il risultât di dute chê brame di disfâ lis Provincis che dome la nestre Region e à volût puartâ indevant", al dis Fontanini.

La riforme in materie di bens culturâi "e determinarà la cancelazion dal intervent des Provincis, - al siere il President - al puartarà al indebilment pal teritori furlan stant che i puarte vie l'impegno costant e consolidât di un Ent che, insiem cun tancj Comuns, fonts propriis, la competence e la dedizion di tancj amministradôrs e colabradorôrs, al à savût dâ fuarce ae ufierte culturâl locâl, permetint la creazion di gnovis professionalitâts che a àn promovût la realizazion di tantis ativitâts sientificis e divulgativis e di vê permetût la ativazion di une grande rêr di contats".